



# **LAPORAN LIPUTAN MEDIA**

**KHAMIS / 17 DISEMBER 2020**

1. **DURIAN TIDAK LAGI BERGELAR 'RAJA BUAH'**
2. **40 TAHUN BAU BABI BAKAL BERAKHIR**
  - **KOSMO**
3. **LKIM MOHON DANA KHAS RM100 JUTA**
  - **SINAR HARIAN**
4. **MAQIS RAMPAS BIJIRIN DARI UKRAINE BERNILAI LEBIH RM40,000**
  - **UTUSAN MALAYSIA**

**DISEDIAKAN OLEH :**

**CAWANGAN KOMUNIKASI KORPORAT**

**(MADA)**

KERATAN AKHBAR : KOSMO

TARIKH : 17 DISEMBER 2020

PERKARA : PERTANIAN & PENTERNAKAN

## Durian tidak lagi bergelar 'raja buah'

**EKSKLUSIF**

Oleh AMREE AHMAD  
utusannews@mediamulla.com.my

**PUTRAJAYA:** Populariti durian yang gah sebagai raja segala buah tahun ini nampaknya mulai 'dicabar' oleh buah-buahan lain termasuk mangga harumanis, rambutan dan dokong.

Bercakap kepada *Utusan Malaysia*, Lembaga Pemasaran Pertanian Persekutuan (FAMA) menjelaskan, permintaan durian bukan sahaja jatuh dari segi nilai jualan keseluruhan, malah kuantiti di pasaran tempatan.

"Penurunan dipengaruhi perubahan cuaca tidak menentu, pengeluaran buah tidak konsisten dan sentimen harga yang tinggi di pasaran," jelas agensi itu di sini semalam.

Tiga faktor itu jelas FAMA, menjadi cabaran bagi memperoleh bekalan berterusan di samping perlu meminimumkan kos belian yang semakin meningkat.

FAMA menambah, meskipun pandemik Covid-19 muncul, aktiviti pembelian di peringkat ladang masih berlaku berikutan permintaan tinggi terutama perniagaan jualan secara dalam talian.

Berdasarkan data untuk tahun ini sehingga Oktober lalu,



**MASALAH** cuaca, harga tinggi dan pengeluaran tidak konsisten menyebabkan durian kurang mendapat sambutan pada tahun ini.

penjualan durian kampung diuruskan agensi itu merekodkan kejatuhan terbesar dengan nilai keseluruhannya RM82,682.

Sebanyak 8,401 kilogram durian jenis tersebut dijual oleh FAMA di seluruh negara berbanding 72,419 kilogram dengan nilai pasaran RM469,603 sepanjang tahun lepas.

Durian kampung pernah meraih rekod tertinggi pada 2018

iaitu 182,595 kilogram dengan nilai RM974,220, melonjak tinggi daripada 2017 iaitu hanya 19,472 kilogram dengan RM248,284.

Turut menerima nasib yang sama ialah durian klon apabila setakat Oktober lepas, cuma 8,974 kilogram dengan nilai pasaran RM191,374 dijual oleh pihak FAMA.

Padahal sepanjang tahun

lalu, sebanyak 48,712 kilogram dengan nilai RM635,805 dicatatkan manakala pada 2018, durian itu pernah pecah rekod sebanyak 94,212 kilogram dengan nilai RM906,452.

Sementara itu pada 2017, meskipun durian klon hanya dijual sebanyak 34,574 kilogram, nilainya mencecah RM872,182 berikutan harga yang amat tinggi di pasaran seluruh negara ketika itu.



Najis babi akan ditanam dan berada di lokasi jauh dari kediaman penduduk

## 40 tahun bau babi bakal berakhir

Oleh SITI NUR MAS ERAH AMRAN,  
ISWAN SHAFIQ ISA

**SEBERANG PERAI** – Kerajaan negeri sedang mengenal pasti satu lokasi strategik untuk dijadikan tempat pelupusan sisa najis babi yang lebih sistematik khususnya di Tasek Gelugor di sini.

Pengerusi Jawatankuasa Agroteknologi dan Keselamatan Makanan, Pembangunan Luar Bandar serta Kesihatan negeri, Dr. Norlela Ariffin berkata, kawasan yang dianggarkan berkeluasan kira-kira 0.8 hektar itu perlu diwujudkan bagi mengurangkan masalah pencemaran air dan bau busuk di beberapa kawasan itu.

Kosmo! pada Ogos lalu melaporkan masalah penduduk di Kampung Selamat dan Kampung Tok Bedu dekat sini yang saban hari terpaksa menghidu bau busuk najis haiwan itu sejak 40 tahun lalu.

Menurut Norlela, cadangan lokasi pembuangan atau pelupusan sisa najis babi secara bersistematik itu bagaimanapun akan dibentangkan terlebih dahulu ketika sesi mesyuarat exco akan datang.

"Apa yang pasti, tapak perparitan (lokasi pembuangan najis babi) itu akan dibina di kawasan yang jauh daripada pemukiman penduduk dan sumber air seperti sungai utama dan sebagainya.

"Kita juga akan gunakan kawasan itu untuk menanam semua sisa pepejal najis haiwan berkenaan hingga pada kedalaman yang mencecah empat kaki (lebih 1.2 meter)," katanya ke-



KERATAN Kosmo! 22 Ogos 2020.

pada pemberita di Perai di sini semalam.

Sementara itu, Jawatankuasa Pengerusi Pasukan Petugas Pencemaran Sungai Kereh daripada Pengoperasian Ladang Ternak Khinzir di Kampung Selamat telah ditubuhkan di bawah Kementerian Alam Sekitar dan Air (KASA) diketuai bekas Ketua Pengarah Jabatan Pengurusan Sisa Pepejal Negara, Datuk Dr. Nadzri Yahaya.

Menurut Nadzri, jawatankuasa yang ditubuh pada September lalu adalah hasil perjumpaan antara Ketua Menteri, Chow Kon Yeow dan Menteri Alam Sekitar dan Air, Tuan Ibrahim Tuan Man pada September lalu.

"Pembabitn pasukan petugas khas terdiri daripada pelbagai pihak berkuasa tempatan (PBT) antaranya Jabatan Pengairan dan Saliran (JPS), Jabatan Alam Sekitar (JAS), Majlis Bandaraya Seberang Perai (MBSP) dan Jabatan Perkhidmatan Veterinar Pulau Pinang (JPV).

"Pasukan ini ditubuhkan khusus supaya setiap agensi dapat bekerjasama dan memberi syor untuk menyelesaikan masalah terbabit.

"Kita akan membantu memberikan sokongan moral, teknikal serta koordinasi supaya tugasan



NADZRI (tiga dari kiri) bersama pegawai JAS meninjau sistem pengaliran kilang babi dekat Kampung Selamat, Tasek Gelugor semalam.

PBT ini lebih selaras dengan satu sama lain," katanya kepada pemberita semalam.

Beliau berkata demikian selepas melakukan lawatan mengejut ke beberapa lokasi di Kampung Selamat, Tasek Gelugor di sini.

Mengulas lanjut, beliau berkata jawatankuasa itu akan membantu menyelesaikan masalah terbabit sehingga ke akar umbi selepas Enakmen serta Peraturan Penternakan Babi Negeri Pulau Pinang 2020 dikuatkuasakan bulan depan.



NADZRI memeriksa melihat kandang babi yang menjadi punca bau busuk beberapa kampung di Tasek Gelugor semalam.

KERATAN AKHBAR : SINAR HARIAN

TARIKH : 17 DISEMBER 2020

PERKARA : PERIKANAN

SINAR HARIAN • KHAMIS 17 DISEMBER 2020



NEGERI

• PAHANG • SE

# LKIM mohon dana khas RM100 juta

Tambahan daripada RM450 juta sedia ada untuk projek perumahan nelayan tahun depan

## KUANTAN

Lembaga Kemajuan Ikan Malaysia (LKIM) akan memohon peruntukan khas sebanyak RM100 juta daripada kerajaan bagi meneruskan projek perumahan nelayan pada tahun depan, kata Ketua Pengarahnya, Othman Abdul Latiff.

Beliau berkata, ia sebagai tambahan kepada peruntukan khas sedia ada sebanyak RM450 juta yang diperoleh pihaknya sejak 2012 bagi memastikan aspek kebajikan nelayan terus dijaga dan rumah mereka

sentiasa berada dalam keadaan yang baik.

“Kita dalam proses untuk memohon susulan peruntukan sedia ada dijangka habis digunakan pada hujung tahun ini dan kita perlukan peruntukan khas ini bagi membantu mereka membaiki rumah sedia ada atau membina rumah baharu.

“Saya minta jasa baik kerajaan sekarang yang prihatin supaya kita dapat membantu mana-mana nelayan yang belum menerima manfaat projek perumahan akan terima melalui peruntukan khas ini,” katanya.

Beliau berkata demikian kepada pemberita selepas merasmikan Majlis Penyampaian Komisyen Kepada Peserta Projek Pemasaran, Insurans Berkelompok dan Bantuan Bencana Alam Persatuan Nelayan Kawasan



OTHMAN

Kuantan di sini pada Rabu yang turut dihadiri Pengarah LKIM Pahang, Farah Shahada Zakaria.

Othman berkata, melalui projek perumahan itu, nelayan yang mempunyai tanah sendiri boleh memohon membina rumah baharu dengan kos RM56,000 mana-

kala bagi pembaikan rumah, pihaknya memperuntukkan sehingga RM13,000 bagi sebuah rumah.

“Bermula 2012 sehingga kini hampir 5,000 buah rumah telah dibina dan kira-kira 100,000 rumah telah dibaiki melalui peruntukan sedia ada itu.

“Jika peruntukan khas tambahan diluluskan lebih ramai lagi nelayan akan menikmatinya,” katanya.  
- Bernama



**KERATAN AKHBAR : UTUSAN MALAYSIA**

**TARIKH : 17 DISEMBER 2020**

**PERKARA : ADUAN**

### Maqis rampas bijirin dari Ukraine bernilai lebih RM40,000

BUTTERWORTH - Jabatan Perkhidmatan Kuarantin dan Pemeriksaan Malaysia (Maqis) berjaya menggagalkan cubaan membawa masuk *millet* (sekoj) dari Ukraine tanpa permit sah ke negeri itu.

Pengarah Maqis Pulau Pinang, Zarina Ramli berkata, bijirin berkenaan dikesan hasil pemeriksaan yang dijalankan di Tapak Pemeriksaan Pelabuhan Pengkalan Kontena Butterworth Utara (NBCT) pada Ahad lalu.

Menurutnya, pemeriksaan mendapati konsainan membawa 902 beg *black millet* (sekoj hitam) tanpa permit import sah daripada

pihak Maqis.

"Kesemua barang dagangan tersebut seberat 22,550 kilogram (kg) yang dianggarkan bernilai RM42,000.

"Semua barangan dagangan berkenaan dirampas dan akan disiasat mengikut Seksyen 11(1) Akta Perkhidmatan Kuarantin dan Pemeriksaan Malaysia 2011 [Akta 728] di mana jika sabit kesalahan boleh didenda tidak melebihi RM100,000 atau penjara tidak melebihi enam tahun atau kedua-duanya sekali," katanya dalam satu kenyataan di sini pada Rabu.

Sementara itu, Zarina berkata,

dalam pemeriksaan berasingan pihaknya merampas sebuah kontena yang mengandungi 1,150 beg *creamy white millet* (sekoj putih) seberat 23,000kg yang dianggarkan bernilai RM36,800 dari negara sama.

Katanya, barang dagangan itu juga didapati tidak mematuhi syarat yang dinyatakan pada permit import yang dikeluarkan oleh Maqis.

"Kes disiasat di bawah Seksyen 15(1) dan jika sabit kesalahan boleh didenda tidak melebihi RM100,000 atau penjara tidak melebihi enam tahun atau kedua-duanya sekali mengikut Seksyen 15(2) akta sama," katanya.



Bijirin sekoj putih dari Ukraine yang dirampas pihak Maqis pada Ahad lalu.